

Ke ea le lumelisa Sechaba sa Heso.

Ke sa boela ke bua le lona sechaba sa Basotho hoseng hoa letsatsi la kajeno ho le khoaolella khatelo pele eo re ntseng re e etsa re le Naha toantšong ea lefu lena la Corona Virus kapa COVID-19 ka moo e tsebahalang kateng. Re letsatsing la bohlano joale ho khinoa hoa metsamao le mesebetsi e tloaelehileng (lockdown) e kene tšebetsong. Ke lakatsa ho nka monyetla ona ho leboha le ho thoholetsa Basotho ba utloileng khoeheletso ena 'me ba lula mahabona. Seo ke ketso ea bohlokoa e supang hore re na le batho ba nkang boikarabelo ka maphelo a bona le a ba bang.

Ho sa le joalo, ho boetse hona le karolo e 'ngoe ea Sechaba eo e sa nkelang khoeletso ena hloohong, kaha ba ntse ba iphethela mabaka a bona joalo ka ha eka ha ho ea etsahala letho. Lona ba joalo ke kopa ho le hlaha leseling ka hore le tsebe hore Mosotho o ne a opile khomo lenaka ha a ne a re: "***ho ipaballa ho molemo ho feta sethlare, etsoe Ngoana mahana a joetsoa o bona ka mali ho rotha.***" Hantle ke leoatla feela le ka lebellang ho tlamelloa ho **ipaballa** le hona ho boloka bophelo ba lona. Basotho ba heso ha re falimeheng re nke mohlala ho ba angoeng ke leholiotsoana lena pele ho rona. Linaha tse kholo tse ikhonang le litabeng tsa bophelo li qabetsoe ke lefu lena. Maphelo a sechaba sa tsona a mangata haholo

a lahlehile re bua tjena, ebile a ntse a tsoela pele ho lahleha. Bao e bang le sa lutse moriting oa tebalo, falimehang bosiu bo sele, nkang boikarabello ka maphelo a lona le hona ho sireletsa maphelo a ba bang ka ho lula malapeng le ho boloka bohloeki ka hohle-hohle.

Ka tsela e tšoanang, ke ipiletsa ho Basotho ba ntseng ba kena ka hare ho Naha ho tsoa Afrika Boroa ka khorona tsa matsa hore ba khutle mekhoeng eo kaha hoo ha ho molemong oa bona, ba malapa a bona kapa Sechaba ka kakaretso. 'Muso o keke oa hanela Mosotho o feng kapa o feng ho tla hae. Kahona sebelisang Maliboho Basotho e le hore mafapha a amehang a tle a nke likhato tse lokelang tsa ho

bona hore bohle re tšireletsehile. Ke ipiletsa ho bao ba ***paqama keiti*** hore ba itlhahise litsing tse lokelang ho hahlobeloa matšoa a lefu lena (screening). Ke ba tiisetsa mona hore bophelo ba Mosotho e mong le e mong bo tla pele, 'me ba ka itlhahisa ka ntle le tšabo ea letho ea ho tšoaroa, hoba moo ha se moo taba e leng teng ha joale.

Ke lakatsa ho le beha leseling Basotho ba batle hore hofihlela ha joale ha re so be le litlaleho tse supang hore lefu lena le se le le teng ka hare ho Naha ea habo rona. Ho rialo ha se ho bolela hore re qhanolle, mohlomong re hlome eka rona ha re na ba le lona. 'Nete e salang ke hore mokhoa oa rona oa tlhatlhobo ha o

bobebe hakalo kaha re sena lisebelisoa tse hlokahalang ho etsa litlhatlobo. Empa le ha ho le joalo tšebelisano 'moho ea rona le Naha ea boahelani e ntle haholo tabeng ena, 'me re leboha 'Muso oa Naha ea Afrika Boroa ka taba eo. Ka hona tsoelang pele ho tlaleha matšao a belaetsang moo ho nepahetseng ele hore likhato tse lokelang li tle li nkuoe nako e sa le teng. Ntumelleng ke thatiselletse polelo ea maobane ea Lekala la Bophelo hore hara babelaelloa ba leshome bao re bileng le bona lipakeng tsa la 27 le la 30 Tlhakubele selemong sena, ba supileng ba bona litlhatlhobo tsa mali a bona li supa ha ba sena tšoaetso ea lefu lena. Re sa letile ho bona hore na litlhatlhobo tse salletseng morao tsa tsona li fihla li re fuparetse

eng. Ha re tsoeleng pele ho rapela Morena Molimo hore a re thuse Basotho kholumolumo ena e re pote ka thoko.

Ke lakatsa hape ho leboha Komiti ea Matona le Bahlanka ba 'Musso ba etelletseng pele letšolo la toantšo ea lefu lena la COVID-19 pele **(National Command Center)**, ka boitelo ba bona le mosebetsi o motle oo ba ntseng ba tsoela pele ho o etsa. Tšoarang joalo Bahlanka ba Morena. Ka tsela e tšoanang, ke lakatsa ho leboha Bookameli le litho tsa Tšireletso le Polokeho ea Sechaba ka mosebetsi o boima oo ba ntseng ba tsoela pele ho o etsa oa ho re thusa ho ipoloka. Ke ba kopela tšebeliso 'moho e ntle ho tsoa ho lona Basotho. Litho

tseo li moo ho phethahatsa molao, 'me li tla nka likhato tsa molao khahlanong le ba ithibang litsebe ka boomo. Ke boele ke supe hore moo ho bileng le tlhokofatsoa ea Sechaba, ke kopa tšoarelo ho lona Basotho. Ke lokela ho le tlalehela hore ke se ke laetse Bookameli bo amehang ho etsa liphuputso le ho nka likhato tsa molao tse lokelang khahlanong le bao e kabang ba tlotse moeli oa tšebetso ka boomo kapa ka morero oa ho silafatsa puso ena ea 4X4.

Ho totobetse Sechaba sa Moshoeshoe hore bohlale ba motho hona le moo bo fellang teng. Ha ho le joalo, re loketse ho lelaletsa mahlo a rona marung, hobane ho teng Eo Lefatše le

tsohle tse ho lona e leng tsa Hae. Eena ke Jehova Molimo le 'Mopi oa rona, eo ka Morena Jesu a re hloletseng lefu. Leha re sitoa ho ea likerekeng hakaalo ka lebaka la lefu lena, sebaleng Sechaba sa Heso hore Morena Jesu O itse moo ba babeli ba bararo ba kopaneng ka **Lebitso la Hae** le Eena O teng. Ka lebaka leo, ke ipiletsa ho lona Basotho ho tsoela pele malapeng le metseng ea lona le ntse le sielana sebaka se lekaneng (social distancing) ho hoelehetsa ho 'Mopi ka mehla hore a ke a phahamise letsoho la Hae e le hore bohale bona bo tle bo re fete ka thoko, 'me Lebitso la Morena oa rona Jesu Krete le tle le bokoe ke hona.

Sechaba Sa Heso,

Ha re ntse re tsoela pele ho loantša sera sena se COVID-19, motho o khathala matla le hona ho soaba ho elelloa hore ka nqena hona le ba bang bao, ka boikhabo bohle, ba leng letšolong la ho fetola Puso ka litsela tseo e seng tsa molao. Ha batho ba lebeletsoe ho ba mahabona le ba malapa a bona e le ho netefatsa polokeho, banna le basali ba bang ba chalaka hara metse le mabatooa mona ho hlohleletsa phetoho ea puso ka litsela lisele. Se soabisang ka ho fetisisa ke hore letšolo lena le etelletsoe pele ke a mang a Maparamente le litho tse ling tsa Lekhotla leo ke leng Moetapele oa lona, ebile e le lona le eteleletseng puso pele. Sena

lithena li se etsa leha ke se ntse ke tiiselitse Basotho bohle, SADC le Lefatše ka bophara, makhetlo a mabeli bonyane, hore leha nako eaka ea ho ba Tona Kholo ka molao e fela ka 2022, ke entse qeto ea ho beha meja faatše ke le Hlooho ea 'Muso oa Motlotlehi mafelong a khoeli ea Phuptjane kapa pele ho moo ha litlhophiso li ka fela ka pele.

Lona beng ba merero ena ea bokhukhuni, ke lakatsa ho le lemosa hore le falimehe, 'me le se bone mahe le sa bone leraba. Lesotho ke Naha ea Puso ea Sechaba ka Sechaba (Democracy), 'me mekhoha ea ho fetola puso e ea tsebahala. Ha ho motho eaka thibeloang ho fetola puso ka molao le hona moo ho nepahetseng. Ka hona

se itumelleng, banna le basali ba heso, ho sebetša ka thoko ho meoloane e beiloeng ke molao ea hore na Puso e fetoloa joang, kaha ho etša ho hong hosele ho sa boleloeng ke molao, e le ketso ea bokhukhuni (Subversion). Ke laela ba ikarabellang tšireletsong ea Naha ena ho fuputsa litlaleho tsa liketso tsa bokhukhini ka botlalo le hona ho nka likhato tse matla tsa molao ho bao ba tlang ho fumanoa e le beng ba merero e joalo. Molaoli oa Sesole sa Lesotho, Mookameli oa Sepolesa sa Lesotho, Mookameli oa Mautloela, le oa 'mphato oa lona Mookameli oa setsi sa Tlhabollo ea Batsoaruo; tieang kanong le sireletse metheo ea Naha, Puso, le Sechaba ka kakaretso khahlanong le

sera sefe kapa sefe se hlahang kante le ka hare ho Naha.

Ruri e ka ba bomalimabe bo bohlo ka ho fetisisa hore ha Naha le lefatše ka kakaretso li betane le kholumolumo ena e Corona Virus, ebe ka nqena hona le ba bang ba itšemmeng bora ka ho leka ho fetola puso ka thoko ho molao feela ka lebaka la lenyora kapa lona lehabea la litulo. Lefu lena leo re tobaneng le lona ke sera se hlahang ka thoko, se rinyang se sa ee ka tšobotsi. Ke sera se qosang hore bohle re beng ka lehlakoreng le le leng la mola oa ntoa, re kopanyeng litheko ho lebisa ntoa ho sona. 'Musu, bohanyetsi le Basotho bohle re lokela ho behella liphapano tsa rona tsa lipolotiki ka

thoko ha nyane, 'me re beng ntsoe-leng ha re loantša lefu lena. Ho seng joalo ntoa ena e tla re hlola, 'me re tla fetoha lesupi re le Naha.

Banna le basali ba heso ba tatetseng litulo, ntho e 'ngoe le 'ngoe e na le nako (**in everything there is a season**), le sebaka seo e etsetsoang ho sona. Behang pelo sekotlolong, 'Na Motsoahae Thabane, ho se ho se tao ke eang, etsoe ke iphatlalalitse joalo ho se mang kapa mang ea ntšusumelitseng ho etsa joalo. Haufinyane ke tla beea meja fatše, ke siece puso ho 'Muso ona oa 4X4 'me oona o tla ba le boikhethelo ba hore na o isa puso pele ka tšobotsi le sebopeho se feng. Haeba le baetapele ba 'nete, ena ha se eona nako ea ho

tseka hore na ke mang ea litulong. Re nakong ea tlokotsi, 'me re lokela ho tšoarana 'moho ka kutloisiso e joalo.

Ho lona banna le basali ba Lekhotla la Kobo-tata le Maparamente a lona, tsebang hore linatla lefatšeng mona li oele ka hore sera se kene lipakeng. **(The might have fallen by allowing the enemy to divide them).** Haeba ha le lumele sena, hetlang morao le shebe nalane ea linatla lefatšeng ekasitana le mehleng ea Bible **(In Bible Times)**. Kobo-tata ke senatla seo ba bohanyetsi ba ka se hlolang feela ka ho se arola. Ba tla etsa eka ba ea le rata, kapa hona ho lumellana le lona, feela bonnete ba taba e le hore botebong ba lipelo

tša bona ba ea tseba hore ba le hloile, ebile ba batla ho le arola e le hore ba tle ba atlehe ho tsoa lipakeng tša lona. ***Ea nang le litsebe ho utloa a utloae!***

Basotho ba Heso

Naha ea Lesotho ke Naha ea Bokreste. Morena Molimo O ratile Lesotho haholo ho tloha mehleng ea Baholo-holo ba rona. Re Naha tjena kajeno feela ka lebaka la Mohau oa Morena Molimo. Ke na le tumelo e feletseng hore O tla tsoela pele ho re hlolela le bothateng bona. Tieang Tumelong ke hona Basotho ba heso.

Ke rata ho qetella polelo ena eaka ka ho le lemosa Sechaba sa Heso hore phirimaneng ea

letsatsi la kajeno Motlotlehi Hlooho ea Naha ea Lesotho o tla le fa molaetsa oa ts'epo le ho le khothatsa hore ha re kaba ntsoe-leng, re tla hlola kholumolumo ena e tjametseng lefats'e le Lesotho e le Naha. Mamelang ke hona Sechaba sa Heso molaetsa oo o molemo oa Motlotlehi, e le khothatso ho Sechaba nakong ena e mahlonoko ea tlokotsi.

**MOLIMO O BOLOKE LESOTHO LE
BASOTHO.**

KHOTSO! PULA! NALA!